



生命个春

紅芽紅芽个面頰卵，隔在大扇玻璃窗門肚，像一蕊一蕊正開个花蕾，乜像該一筍一筍正暴个新芽。擘開目，清淨个目珠仁瞞啊瞞，錫著窗門外背个後生爺衰，眉翹目笑，口涎水硬硬斯愛跌落來咧，心肝肚恁想：恁精春个細人，下次擺毋知幾有出息哦！感受著爺衰个期待，細嬰兒皺鼻擘嘴，「哇！」圓圓个細嘴，像水竇哼波愛討食个鯉魚，「唉哦！」連噉都恁得人惜哪！牽腸掛肚个爺衰，隔在透光个玻璃窗門外背無結無煞，目金金嘴擘擘，看緊這血脈延續个新生命。

生命个誕生確實係奇妙又心色个大事，乜係上天个恩賜，十月懷胎係仰脣个艱辛，老公知得，摘核舖娘个肩頭，雙雙企在透光个窗門外背。大大扇个玻璃窗門，隔開臍帶相連个親密接觸，隔毋開親情个心心念念。幸福个花蕾一蕊蕊，傳達出深深个公姐情，還過淄淄个感恩心意。春天，在醫院个這層樓，綻筍開花，川流毋去。

公園个一角，清清亮亮个笑聲無停。會遶人个快樂聲響，斯像地泥下遞藤个細黃花，遶去滿哪都係，間核有低低个督聲、咄聲，這係阿爹阿奶渡孫，在公園兒童區搞寮个情景。細人，對嬰兒算起勢，有正學行个、講話毋鬥句个，到會走个三、四歲子，嘻嘻嘩嘩大家搞做下，無分你抑偌，兄弟抑姊妹。溜滑梯生理一等好，上上落落一個接一個，對上背觸啊落來，跋起身過再來一到，細人毋會懶，大人斯有罣係。孔翹枋一上一下，孔過來翹過去，細人頓去歡喜都嘿嘿滾，大人頓無兩下，屎脰斯會必析，骨頭乜硬硬會散撇，涼涼个樹下，嬰兒安然睡目，笑，留在嘴脣，留在開展个兩眉之間，樹頂，有鳥个嚙啖，有喊醒熱天个蟬噉，有風一吹斯晃來晃去个阿勃勒花，不時還看得著竄來竄去絡食个膨尾鼠……。

脣口掌細人搞寮个阿爹阿奶，係咧！在該涼涼个樹下一坐，頭那斯像釣魚个樣一點一揷，啄目睡咧，孫个笑，在厥个夢中，在黃金雨樣个落花肚，在溜來溜去个南風頂，跔核風，穿過樹尾，悠悠个白雲，載佢轉到該闊闊个伙房屋，佢看著阿爸做事个身影，聽著阿姆督佢愛渡好老弟老妹个話語……。

作者：劉玉蕉

☆詞彙學習☆

【紅芽】fung` nga`：霞紅色。

【毋鬥句】m` deu` gi`：前句不搭後句。

【下次擺】ha` ci` bai`：以後、將來。

【觸啊落來】cu` a+ log` loi`：溜下來。

【水竇】shui` deu`：水裡。

【孔翹枋】kung` kiau` biong+：蹺蹺板。

【哼波】bud` po+：口中吐泡沫。

【嘿嘿滾】he` he` gun`：聲音高而亮。

【間核】gam` hed`：夾雜著。

【必析】bid` sag`：裂開。

☆文法學習☆

【硬硬】ngiang` ngiang`：原指「硬是、執意」，指在條件不允許的情況下仍然堅持進行某行為。語意轉化後，如本文中的用法，引申表示「險些、差點」之意。

例1：喊佢毋好去，佢斯硬硬毋聽人講。（叫他不要去，他卻硬是不聽人勸。）

例2：偌食忒多東西，肚屎撐都硬硬會爆撇咧。（我吃太多東西，肚子撐得快要爆炸了。）